

beuter vmb .8. Meil wegs vnder Ofen / vberfallen die Tartarn im Läger / vnd erschlagen ihrer viel / machen vmb 400. gefangene Christen ledig / vnd bringen ein ansehentliche beut davon.

ANNO MDC.

Den 22. Aprilis ist Herr Palst auß seinem Schloß zu Biersberg an einem hitzigen Fieber gestorben.

Im Aprili hat Nicolaus Horobath des Graffen zu Serin Weida vnd Thussy Andreas sich auffgemacht mit 450. mann / ziehen nach dem Castell Sanct Nicolai / der Bassa von Sigeth aber stößet vnversehens auff Nicolaum Horbath / vnd thun ein solch hart treffen / daß er Nicolaus mit etlichen wenigen schwerlich dauon kome. In dem nun der Bassa die Todte Christē besihet / vñ keines Feindes mehr achtet / kome Thussy Andreas / find den Bassa / so von Pferde abgestigen / greiffet ihn an / vnd erleget also denselben mit seinem Volck.

Im Majo versambten sich die Freubeuter von Comorra / Graan vñ andern Orthen / auff 2500. starck / plündern den Marck Kombor / von dannen ziehen sie nach Essig an der Traa / bekommen daselbst ein grosses gut. Da dieses die Türcken auff den andern Bestungen innen worden / kommen ihrer auff 5000. zusammen / vnd haben dreyßsig Feldstücklein bey sich. Ob nun wol der Türck noch so starck / so setzen doch die Freubeuter dermassen ihnen zu / daß sie den newen Bassa von Sigeth mit zween Beegen vnd 500. mann erschlagen / vnd sonst viel vbel verwundt worden. Auff der Christen seiten aber sind nit vber 50. blieben.

Im Junio greiffen die Handtücken Bassam Jamifam an / so Prouiant nach Weissenburg / Ofen / Sigeth vnd andere Ort führet nimbt ihm 14. Schiff / vnd schlagen 500. Türcken zu Todt.